

რელიგიური ფაქტორი ეკონომიკური პოლიტიკის ფორმირებაში

გია ზოიძე
სტუ-ს დოქტორანტი

რეზიუმე

ეკონომიკურ პოლიტიკაში, მისი ფორმირების და რეალიზაციის პროცესში მთავარი ორიენტირი არის ადამიანი; სწორედ ადამიანისეულ კაპიტალზე სრულად მორგებული ეკონომიკური პოლიტიკა არის სიცოცხლისუნარიანი და წარმატებული. და რამდენადაც ამ სახის კაპიტალში ეკონომიკური, სოციალური, ფსიქოლოგიური ასპექტების გვერდით თავის ადგილს იჭერს რელიგიური ასპექტი, ამდენად რელიგია ეკონომიკური პოლიტიკის ერთ-ერთ ძალზე ღირებულ „არამატერიალურ“ საყრდენს წარმოადგენს.

საკვანძო სიტყვები: რელიგია, მსოფლიო რელიგიები, რელიგიური ფაქტორები, ცივილიზაცია, გლობალიზაცია, გლობალური კონკურენტუნარიანობა.

RELIGIOUS FACTOR IN THE FORMATION OF ECONOMIC POLICY

Gia Zoidze

The student of Third PhD Course,
Georgian Technical University

RESUME

In economic policy, the main focus of its formation and realization is the man; The economic policy that is fully adapted to human capital is viable and successful. And as far as the economic aspect of its place is found in economic, social and psychological aspects in this type of capital, so religion is one of the most valuable “non-material” pillars of economic policy.

Key words: Religion, World Religions, Religious Factors, Civilization, Globalization, Global Competitiveness.

ძირითადი ტექსტი

„უღმერთობა საკაცობრიო დანაშაულია, ხოლო ტალანტი მრწამსის გარეშე ქმნის არამზადებს“.

კაცობრიობის განვითარების თანამედროვე ეტაპის ერთ-ერთი ძირეული თავისებურება არის ის გარემოება, რომ დღეს ყველა მოქმედი რელიგია (ქრისტიანობა, ისლამი, იუდაიზმი, ბუდიზმი) ადამიანის ზნეობრივი სახისა და მოქმედების ყველა შესაძლო არეალიდან საზოგადოების, სახელმწიფოს არა მხოლოდ იდეურ-პოლიტიკური სახის განმსა-

ზღვრელი გახდა. უფრო მეტიც, რელიგიამ სახელმწიფოსა და საზოგადოების, თვით ადამიანის ცხოვრების ისეთ ძირეულ საწყისში შეაღწია როგორც არის ეკონომიკა.

ამდენად, ფაქტიური რეალობა არის ის, რომ რელიგია იმ განსაკუთრებული იდეოლოგიური ინსტიტუტის რანგში გამოდის, რომელიც საზოგადოების სოციალურ-ეკონომიკური განვითარების შემოქმედებით ძალად გარდაიქმნა და არსებობს. საყოველთაოდ აღიარებულია, რომ თანამედროვე მსოფლიოს განვითარებაში ორმა უდიდესმა ძალამ - რელიგიამ და ეკონომიკამ არსებითი როლი შეასრულა; რელიგია თავისთავად ადამიანის ქმედების აქტივიზაციის მოცემულობა და ზნეობრიობის რეალიზაციის ნოყიერი ნიადაგია; აღნიშნული მოცემულობა კი ეკონომიკის შემოქმედის - ადამიანის შრომითი საქმიანობის ფონზე ძალზე საინტერესო იდეურ-ეკონომიკური თუ ზნეობრივ-ეკონომიკური ინსტიტუციალის სახეს ჰქმნის.

ამ ფონზე ერთმანეთის პირისპირ დგას ერთი, ძალიან მარტივად „წმინდა“ მატერიალისტური და ყოფიერი მოცემულობა, მეორე, კი, ამდენივე ძალისხმევით მქონე სულიერი და ზეციური არეალი. ამ თითქოს-და შეუთავსებელ ძალთა ერთიანობაში ნათლად ჩანს მათი ღირებულებითი მნიშვნელობა. დღეს, ამ ორივე ძალის მარგი ქმედების კოეფიციენტი კიდევ უფრო ძლიერდება და სულ უფრო აღქმადი ხდება.

ეკონომიკური პოლიტიკა უბრალოდ ვერ იტანს და მისთვის უბრალოდ უცხო სხეულია საქმიანი ურთიერთობების დამაკნინებელი მოცემულობები, რაც საბოლოო ჯამში თავის მხრივ ძირეული რელიგიური მოთხოვნებიდან გადახვევის ტოლფასია. კერძოდ, მაგალითად ბიუჯეტის შემოსულობების კლება და ხარჯვითი ნაწილის დაუსაბუთებელი ზრდა, სახელფასო ან საპენსიო ხასიათის საკითხების დაურეგულირებლობა, მონოპოლიზმი წარმოებისა და მომსახურების სფეროში და ფასებით მანიპულირება, სახელმწიფო ბიუჯეტის თანხებით თაღლითობა და ფინანსური მაქინაციები, არაკეთილსინდისიერი რეკლამა და სხვ.

მსგავსი სახის ქმედებები ნათლად აჩენს არა მარტო ეკონომიკური პოლიტიკის არაეფექტურობას, არამედ მის რელიგიურ უზნეობასაც. ეკონომიკური პოლიტიკა სულიერად სამართლიანია მხოლოდ მაშინ, როცა იგი ეკონომიკურ სამართალს იცავს და სიმართლეს „ყოველთა ჟამსა“ მთელის არეალით მოითხოვს. დღეს, ყველა განვითარებული საზოგადოება, ორიენტირებულია წარმატებისთვის გამიზ-

ნული საერთო ეკონომიკური პოლიტიკის შემუშავებით და მისი ხორცშესხმით. აღნიშნული პროცესი მთლიანობაში მარტივი სრულებით არ არის, და, იგი რთული და ამავე დროს მძიმეც კი არის. ეს გარემოება ძალიან მტკივნეულად აღიქმება ჩვენი ქვეყნის - საქართველოს მაგალითზე, სადაც პოსტკომუნისტურობის ნიშნულები და „ბრმა ემოციები“ ჯერ კიდევ არ არის დაძლეული. ამიტომაც არის რომ დღეს ქვეყანაში არსებული ეკონომიკური რეალობა არც თუ ისე მისაღებია, როგორც საზოგადოების თითოეული წევრისათვის, ისე მთლიანად საზოგადოებისათვის.

აღნიშნული აზრის დამადასტურებელია ისრაელის სახელმწიფო, სადაც რელიგიის მიმართ სახელმწიფოებრივი დამოკიდებულების მოცემულობა და ეკონომიკური პოლიტიკის მიმართ რელიგიური დამოკიდებულების სიმძიმე ერის ღირსებად წარმოჩინდება. აქ არსებული ბიზნესი იდეურ-რელიგიურ ფესვებზე მჭიდროდ არის დაყრდნობილი, ადექვატურად ეკონომიკაც მსგავს მოცემულობაშია, და საბოლოო ჯამში შედეგიც სავსებით კანონზომიერია. რელიგიური ფაქტორი ქვეყნის ეკონომიკური პოლიტიკის ფორმირებაში მორალურ-ზნეობრივი ხერხემლის რანგში გამოდის.

ჩვენი ქვეყნის ეკონომიკური პოლიტიკის სინამდვილე და რეალობა იმ საფეხურზეა, რომ იგი ნებისით თუ უნებლიედ გვერდს უვლის, ან უბრალოდ, ვერ ხედავს ან ვერ აცნობიერებს რელიგიის „წონადობას“. ყოველივე ეს იმ ფონზე ხორციელდება, როცა ეკონომიკური პოლიტიკა, ანუ საზოგადოების სრული კეთილდღეობის მიზანდასახულობა, უბრალოდ ვერ ამჩნევს, ან არ ხედავს ეკონომიკური ზრდისა და საზოგადოების ეკონომიკური ზნეობის ერთ-ერთ მგრძნობიარე და მასტიმულირებელი ფაქტორის - რელიგიის ქმედითუნარიანობას, აღმშენებლურ პოტენციალს და შემოქმედობითობას.

აღნიშნული შესხედულების რეალური ხორცშესხმის აუცილებლობას ეკონომიკურ პოლიტიკაში, პრაქტიკულად რელიგიისა და საზოგადოების ურთიერთდამოკიდებულების მაგალითზე ვხვდებით, სწორედ ამ მოცემულობაში წარმოჩინდება რელიგიის ადგილი და მნიშვნელობა ეკონომიკური პოლიტიკის ფორმირების პროცესში.

ცივილიზაციური იდეოლოგიის ძირითად ელემენტს არსებული ცივილიზაციების უმეტესობისათვის წარმოადგენენ რელიგიური სისტემები. ცივილიზაცია არ არის გაქვავებული კონსტრუქცია და მას გააჩნია უნარი ისესხოს სხვა ცივილიზაციური სისტემებისგან იდეოლოგიის ინსტიტუტები და ელემენტები, რომლებიც მათ აძლევს კონკრეტულ უპირატესობას ევოლუციურ ბრძოლაში. ამ ელემენტების შემოტანით ჩვენს ცივილიზაციაში და მათი გონივრული შეხამების პოვნით ჩვენს კულტურასა და წეს-ჩვეულებებთან, შეიძლება გავზარდოთ საკუთარი კონკურენტუნარიანობა და შევეცადოთ მოვიგოთ ბრძოლა ეკონომიკური ლიდერო-

ბისათვის. სწორედ ამიტომ, სასარგებლოა, და აუცილებელიც კი, იცნობდე შენს პარტნიორს. ხოლო იმისათვის, რომ უკეთ გაიგო და ქცევის რეაქციის პროგნოზირება მოახდინო, უნდა იცოდე მისი ფასეულობათა სისტემა და მსოფლმხედველობის საფუძვლები, რომლებიც ეროვნულ კულტურაში, ცივილიზაციურ იდეოლოგიასა და რელიგიაში დევს.

თანამედროვე ეკონომიკურ ცხოვრებაში ეს ცოდნა შეიძლება გამოვიყენოთ საქმიანი მოლაპარაკებების წარმართვის დროს, მარკეტინგული კვლევების პირველ ეტაპზე, საქონლის წინ წასანევადად საზღვარგარეთულ ბაზრებზე და სხვა მრავალი ამოცანის გადაწყვეტის დროს. მსოფლიო ეკონომიკა ხდება, აგრეთვე, პრაქტიკული მეცნიერებაც. ჩვენ მუდმივად მივმართავთ მიღებული ცოდნის გამოყენების შესაძლებლობებს ბიზნესში.

ფაქტია, რომ რელიგიამ საზოგადოების მორალურ, ეკონომიკურ, სამართლებრივ თუ პოლიტიკურ ცხოვრებაში უდიდესი როლი იტვირთა; იგი საზოგადოების ზნეობრივი ინსტიტუტის რანგში საზოგადოების განვითარების შემოქმედებით ძალად წარმოჩინდა. საზოგადოებრივი ცნობიერების რანგში რელიგია სოციალური ერთობის გამომხატველიც კი გახდა; აღნიშნულის ფონზე საკმაოდ საინტერესოა პრაქტიკის გადასახედიდან ეკონომიკის ძირითადი პრინციპებისა და რელიგიური მორალის შეთანანწყობის საკითხი. აღნიშნული გარემოება ნათლად ჩანს ეკონომიკური პოლიტიკის ფორმირების პროცესში, როცა რელიგიური ფაქტორის გათვალისწინების ფონზე და მისი გადასახედიდან ხდება პრობლემის გაანალიზება.

მსოფლიო ეკონომიკური ფორუმის მკვლევარები თავიანთ ანგარიშებში მიუთითებენ, რომ „განსხვავებებს ეროვნულ ფასეულობებში, კულტურაში, ეკონომიკის სტრუქტურაში, არსებულ ორგანიზაციებსა და ისტორიულ განვითარებაში - შეაქვს წვლილი წარმატებული კონკურენციული უპირატესობების მოსაპოვებლად“.¹

ცნობილი ამერიკელი მეცნიერი პროფ. გ. მენქიუ წერს: „ჩვენი პოზიტიური შესხედულებები სამყაროს მოწყობის შესახებ ჩვენსავე ნორმატიულ შესხედულებებზე მოქმედებს. ნორმატიული დებულებების შესაფასებლად არა მხოლოდ ფაქტებია საჭირო, არამედ, გარკვეული ფასეულობითი ორიენტირებიც“.² ამგვარად, ეროვნულ ფასეულობებს, რელიგიასა და კულტურას მნიშვნელოვან როლს ანიჭებენ დიდი მეცნიერები ქვეყნის წარმატებული ეკონომიკური კურსისა და შედეგად, მისი ეკონომიკის კონკურენტუნარიანობის ამაღლებაში.

ის, რომ მრავალ სახელმწიფოში რელიგიის როლი მნიშვნელოვნად დიდია როგორც დემოკრატიული ღირებულებების ჩამოყალიბებაში, ისე პოლიტიკურ-ეკონომიკური განვითარების კუთხით ეს

1 ჰარვარდის უნივერსიტეტის პროფესორი მ. პორტერი - „ერების კონკურენციული უპირატესობები“.

2 მენქიუ გ. - „ეკონომიკის პრინციპები“, 2008წ., გვ. 29

ნათელია. თუმცა ამას გარდა, აღსანიშნავია ისიც, რომ ხშირ შემთხვევაში რელიგია არ უწყობს ხელს ქვეყნის პოლიტიკური, ეკონომიკური თუ სხვა სფეროების განვითარებას. ამის კარგი მაგალითია ჩვენი ქვეყანა. რა თქმა უნდა, რელიგიას საქართველოს ეკონომიკურ და პოლიტიკურ განვითარებაში დიდი წვლილი მიუძღვის, თუმცა საყოფადღებოა მისი უარყოფითი მხარეებიც, ამისთვის უნდა მოვიშველიოთ ჩვენი ქვეყნის ისტორია, რომელიც მუდამ უცხო დამპყრობლებისგან სარწმუნოებისა და ტერიტორიების დაცვაზე მოგვითხრობს.

ისტორიული განვითარების სხვადასხვა ეტაპზე არაერთხელ გახდა ქრისტიანობა პოლიტიკური ორიენტირის განმსაზღვრელი თუ პოლიტიკით განსაზღვრული, რამაც საბოლოოდ კარგი შედეგი არ მოუტანა ქვეყანას. რუსიფიკაციის პროცესი, ეს გახლდათ დახმარების სანაცვლო ანექსია, რომელმაც ცუდად იმოქმედა ქვეყნის პოლიტიკურ-ეკონომიკური თუ სხვა კუთხით განვითარების პროცესზე. საქართველომ დაკარგა დამოუკიდებლობა და იდენტობა პოლიტიკური, ეკონომიკური, სოციალური თუ სხვა სფეროში გადწყვეტილების მიღების პროცესში და სრულიად დამოკიდებული გახდა რუსეთის იმპერიაზე. ეს არის ერთ-ერთი მაგალითი იმისა, თუ რა უარყოფითი გავლენა შეიძლება მოახდინოს რელიგიამ ქვეყნის პოლიტიკურ-ეკონომიკურ განვითარებაზე.

ვფიქრობ, რომ მნიშვნელოვანია ჩინური და იაპონური გამოცდილების უკეთ შესწავლა, რომლებმაც მოახერხეს და სწრაფი ტემპებით მიაღწიეს ეკონომიკურ აღმავლობას, თანაც ისე, რომ ეროვნული ტრადიციები არ დაუკნინებიათ, პირიქით, შეავსეს იგი თანამედროვე საერთაშორისო გამოცდილებითა და გამოწვევებით.

ჩინური მსოფლმხედველობის ნიშანდობლივ თვისებას წარმოადგენს მრავალი რელიგიური შეხედულების რთული გადახლართვა. ჩინელთა უმეტესობა მისდევს კუნ ფუ ცზის აღთქმებს, ამასთან სჯერათ დაოსი და იცავენ ბუდისტურ რიტუალებს. ძირითადად ამ 3 რელიგიაზე დაფუძნებულია თანამედროვე ჩინური ცივილიზაცია. თუმცა, ამისათვის უცხო არ არის სხვა რელიგიებიც. ჩინურ ტაძრებში კონფუციის სტელების გვერდით, გაღმერთებული ლაო ცზის გამოსახულებებთან და ბუდის სტატუებთან ერთად შეიძლება შევხვდეთ ქრისტიანულ ჯვარცმას და მუსულმანურ სიმბოლიკას. ჩინეთი უზარმაზარი და მრავალსახოვანია. იგი სიამოვნებით და ორგანულად ითვისებს უცხო კულტურის ელემენტებს. ამაშია მისი, თუ გნებავთ, კონკურენტული უპირატესობა. მის საუკუნეებით შემონახულ კონფუციანულ ინსტიტუტებს შეიძლება ენდოთ და დასავლეთის ინვესტორებიც სწორედ მათ ენდნენ, ჩადეს რა უზარმაზარი საშუალებები ჩინურ ეკონომიკაში.

სწორედ აღნიშნული ქვეყნები უნდა წარმოადგენდნენ კარგ მაგალითს სამომავლოდ ჩვენი ქვე-

ყნის სწრაფი წინსვლისა და განვითარებისათვის. მიმაჩნია, რომ საქართველოც უფრო მეტად უნდა გახდეს ტოლერანტი ერი, ვიდრე აქამდე ყოფილა, რათა ქვეყანაში მოხდეს მრავალფეროვანი და მრავალეროვნული ინვესტიციების მოზიდვა ქვეყნის ეკონომიკური პროგრესის დასაჩქარებლად და საერთაშორისო გამოცდილების ჩვენთვის სასიკეთოდ გამოსაყენებლად. ეს ყველაფერი, რა თქმა უნდა, არ გულისხმობს ეროვნული ტრადიციების და კულტურის უგულვებელყოფას, პირიქით, ეროვნული ღირებულებების, თვითშეგნების და კულტურის შენარჩუნების კვალდაკვალ უნდა მოხდეს თანამედროვე, ინოვაციური და დახვეწილი პროგრესის მორგება ჩვენს კულტურულ ფასეულობებთან, რასაც შეუძლია სინერგიული ეფექტის მოხდენა და, ქვეყნის ეკონომიკური პროგრესის დაჩქარება.

დასკვნა

რელიგიური ფაქტორები არ შემოიფარდება მხოლოდ პირდაპირი გავლენით გადწყვეტილებების მიღებასა თუ საერთაშორისო მოვლენების განვითარებაზე, პარალელურად ისინი ახდენენ უფრო სტრუქტურირებულ გავლენას და ეს გავლენა მით უფრო მნიშვნელოვანია, რამდენადაც უფრო მყარია მათი ბუნება, ვიდრე ცვალებადი საზოგადოებრივი აზრის რევოლუცია.

რელიგიასა და პოლიტიკას შორის დღეს არსებულ ურთიერთმიმართებასა და ქვეყნის ეკონომიკურ-პოლიტიკურ განვითარებაში მისი ფუნქციის შესახებ საუბარი შეუძლებელია **გლობალიზაციის** ცნების გამოყენების გარეშე. გლობალიზაცია ერთიანი, ზოგადსაკაცობრიო ღირებულებათა სისტემის შექმნას გულისხმობს, რომლის საფუძველშიც დგას დამოუკიდებელი ინდივიდი, რაც, თავის მხრივ, არ ემთხვევა ცალკე აღებული რელიგიების განწყობებს, რომელთათვისაც მორწმუნეთა კოლექტიური ინტერესებია პრიორიტეტული. რელიგიური პოზიციიდან გლობალიზაციის პროცესის კრიტიკოსები მას ბრალს სდებენ სეკულარიზაციასა და რელიგიური ღირებულებების ნგრევაში.

გლობალური ღირებულებები თავიანთ გზას უფრო ადვილად მაშინ იკვლევენ, როდესაც ტრადიციული კულტურა და რელიგია კრიზისს განიცდის. საერთაშორისო პოლიტიკურ ასპარეზზე, რელიგიის ფაქტორის შესუსტების კვალდაკვალ, გლობალიზაცია თავის გამოხატულებას ერთიანი მსოფლიო ბაზრის შექმნასა და სხვა მატერიალურ ფაქტორებში ჰპოვებს. მიუხედავად იმისა, რომ ეს დავის კიდეც სხვა სფეროა.

უმთავრესია, ის, რომ რელიგიას ოდითგანვე მნიშვნელოვანი ფუნქცია და როლი ეკისრა ქვეყნების პოლიტიკურ-ეკონომიკური განვითარების კუთხით, რაც დღესაც არ კარგავს თავის მნიშვნელობას და გვევლინება დემოკრატიის, პოლიტიკური განვითარების, ეკონომიკური სტაბილურობისა და

ქვეყნის ინტერესებისა და იდენტობის შენარჩუნების ხელშეწყობა არსებით მექანიზმად.

ეკონომიკურ პოლიტიკასა და რელიგიას შორის არ არსებობს მხოლოდ ცალმხრივი მოძრაობა, აქ გარკვეული აზრით სახეზეა “ურთიერთშემხვედრი” დინება. როცა საზოგადოების რელიგიური სიმნიფერალურად ხელშესახებია, სწორედ მაშინ, აქ ფორმირებული ეკონომიკური პოლიტიკა ადექვატურად მოტივირებული, ცხოველმყოფელი და წარმატებულია.

გამოყენებული ლიტერატურა

1. ჰარვარდის უნივერსიტეტის პროფესორი მ. პორტერი - „ერების კონკურენციული უპირატესობები“.
2. მენქიუ გ. - „ეკონომიკის პრინციპები“, 2008წ., გვ. 29

3. მაქს ვებერი - „ნარკვევები რელიგიის სოციოლოგიის შესახებ“, მთარგმნელები ნინო ფირცხალავა და ემზარ ჯგერენაია, თბილისი საგამომცემლო სახლი „მარსი“, 2004 წ

4. ნარინდოშვილი მ., გოგელია ვ., ჯულაყიძე თ., ჯაში ზ., გლურჯიძე ე. - „რელიგიის თავისუფლება“, თავისუფლების ინსტიტუტი, თბილისი 2004

5. მოვსესიანი ა.გ., ოგნივცევი ს.ბ. - „მსოფლიო ეკონომიკა“, თბილისის სოციალურ-ეკონომიკური ინსტიტუტი, თბილისი 2003

6. Sriya Iyer - „The New Economics of Religion“, University of Cambridge and IZA, August 2015

7. Filipe Campante, David Yanagizawa-Drott - „Does Religion Affect Economic Growth and Happiness? Evidence from Ramadan“, Harvard Kennedy School, September 2013

8. Robert J. Barro and Rachel M. McCleary - “Religion and Economic Growth”, Harvard University, April 8, 2003